

KEN TA E GRANDINAN DEN DROGA?

ORANJESTAD (AAN): Cada biaha polis y douane ta gara mulanan y hendenan local cu ta trata na subi avion cu droga y ta cada biaha pueblo ta tende cu mester tin un o mas deposito grandi di droga na Aruba, pero te awe polis no a logra di saca di ni un di e mulanan, ta di kende nan a haya droga?

Cada biaha pueblo mester sigui kere den e excusa föfo cu ta for di un Colombiano mulanan a haya pago pa pone droga abordo di avion o pa bay como mula?

Ta unda e Colombiano famoso aki ta y ta di con te awe polis no a logra di gara e grandinan?

Autoridadnan competente no ta conciente cu si nan mes no impone castigonan mas pisa pa esnan cu no kier papia y bisa ta kende ta esnan cu tras di cortina ta suministra lotenan di droga pa mulanan hiba Hulanda o Merca, cu cos ta sigui asina y cu tur hende ta sigui purba nan suerte pasobra castigonan y condicionnan di prison na Aruba ta sumamente bon?

Straño ta cu den tur e añanan cu a pasa cu masha hopi hende a ser gara cu droga, te awe e deposito grandi di droga na Aruba no por a ser haya door di polisnan.

Unda e batayon di super polisnan di Hulanda a keda cu pa tanto aña caba hunto cu Seguridad Nacional di Aruba y di Hulanda a sinta traha tur sorto di lista di grandinan den droga, a keda pa gara e grandinan?

Den e asunto di Cargo Zaak tur cos a worde tapa y ningun grandi a ser gara.

Den e caso di barco Daniel Leo cu a bay Hulanda carga cu droga, na Hulanda algun hende a worde deteni, pero nada particular a sali afor y te awe autoridadnan di Aruba cu tabata tin un beslag poni riba e barco Daniel Leo, no a haya cooperacion di Ministerio Publico di Hulanda encunto paradero di e barco Daniel Leo di cual un fiscal na Hulanda a declara cu e no tabata sa unda e barco a ser warda na Hulanda y si e tabata mes e no lo bisa ningun hende tampoco.

Ta dje forma ey Hulanda hunto cu gobierno di Aruba ta kere cu nan por sigui gaña pueblo cu nan ta traha cu alma y cuerpo pa combati criminalidad internacional?

Ta dje forma ey gobierno di Aruba hunto cu gobierno Hulandes por sigui hustifica e batayon di spion y polisnan di Hulanda cu nan a trece Aruba cu un monton di aparatonan sofisticada pa tap telefon di casi tur hende?

Gobierno di Aruba por hustifica extradicion di tres yiu di tera pa exterior si nan mes te awe no por duna pueblo claridad riba e barco Daniel Leo cu a bay para te na Hulanda y cual barco cu a costa pueblo di Aruba hopi placa a trafica droga na grandi y te awe Ministerio Publico Hulandes tin

tur cos tapa?

Bo no por extradita tres yiu di tera y den bo mesun cas bo ta tapa narco trafico caminda cu autoridadnan hudicial mes tabata involvi y aparentemente ainda ta involvi.

Tin un caso straño andando na Hulanda pa cual un Arubiano E.C ta deteni y cu na luna di januari lo bay rebenta.

Na Aruba documentonan lo bay skeiro tur caminda ora cu e caso aki yega su punto culminante y pueblo lo haya pa wak listanan di telefonnan di hendenan cu tabata worde getap.

Listanan di nomber di esnan cu a worde acerca pa participa den narco trafico y te hasta copia di transaccionnan bancario cu a tuma lugar y cu lo mester a tuma lugar, pa asina seduci Arubianonan pa trafica droga y pone trampa pa comerciantenan local.

Esnan cu a traha lista di comerciantenan Arubiano ta coriendo un careda di cabez di gai, pasobra nan ta pega cu diferente caso, pa cual nan no por suministra autoridadnan den exterior cu pruebanan duro pa por hustifica casonan den corte.

E berguensa internacional mas grandi lo bay ta ora cu documentonan ser publica cu ta muestra con esnan cu mester combati narco trafico mes tabata y aparentemente ainda ta involvi den

narco trafico, y debi na nan forma di proceder nan a hinca husticia Mericano den un posicion dificil cu autoridadnan Mericano no tin prueba duro pa huzga cierto hendenan.

Merca sigur no lo bay guli e pildora marga ey y lo tira e bala bek den scochi di esnan cu a orkestra tur cos y cu mester bay para responsabel pa casonan internacional grandi cu lo bay tin pa daño y perjuicio miyonario.

Pueblo di Aruba keto bay ta pendiente pa cierto cuentanan bancario cu no a ser publica y cu tabata encera sumanan grandi di placa pa cual Ministerio Publico Hulandes no por a duna cuenta.

Ultimo dianan cu a pasa, algun Arubiano a ser menaza cu si nan papia o saca documentonan sumamente comprometedor pa cierto instancianan gubernamental den Reino, nan bida lo core peliger pasobra e grandinan na Hulanda cu lo ta tras di henter e asunto aki, lo manda hende pa regla cuenta y te hasta tabata tin menaza di desaparicion di hende, segun comentario cu DIARIO a haya.

E menazanan aki a yega laat pasobra ya servicionan di inteligencia di paisnas vecino lo ta dispone di documentonan cu ta muestra con wega sushi tabata worde hunga riba lomba di pueblo di Aruba y Antiyas.

Cargo Zaak, Orion Zaak y Barco Daniel Leo hunto cu e escandalo di IRT no ta e episodio final di escandalonan di narco trafico tolera di parti di instancianan hudicial Hulandes, pasobra tin mas asunto pa sali den publicidad; tur cos ta un cuestion di tempo pa e bom rebenta.

Esnan cu na Aruba y Antiyas tin documentonan den nan poder, a laga sa cu nan a plama nan documentonan na diferente lugar y pais, pa evita cu pasa cu nan mescos cu loke a pasa cu e Arubiano deteni na Hulanda di cual diripiente tur su documentonan a somenta.

E marinier cu a yuda autori-

dadnan policial Hulandes den Orion Gate ta biba cu miedo y ta pakico e mester tin miedo si polis Hulandes mes a involvi e marinier aki den narco trafico cu a bay pa colmo via e infraestructura di Marina Real?

E miedo grandi cu e marinier aki tin no ta pornada, si mester realiza cu un marinier Antiyano deteni den e mesun Orion Gate, a muri di un hersenbloeding diripiente y straño, den prison na Hulanda y morto no por papia; ni cu ayudo di Yomanda y e homber di spirito den botter!

Pa tur dicon tin un pakico; keda pendiente pasobra e puzzel ta formando!

Biblioteca Nacional ta anuncia cambio di horario pa prestamo di buki

ORANJESTAD (AAN) -- Biblioteca Nacional ta participa na su miembro y usuarianan algun cambio den horario di prestamo di buki. En conexion cu celebracion di Pasco, diabierna 18 di december awor, biblioteca lo cera pa 5'or di atardi. E dia aki no tin "avonddienst". Ultimo dia cu por fia buki pa

1998 ta 24 di december. Entre Pasco y Aña Nobo Biblioteca lo ta cera, y lo habri bek pa ofrece su servicionan dialuna 4 di januari '99.

Management Team y personal di Biblioteca Nacional Aruba kier a desea tur su miembro y usuarianan feliz dianan di fiesta y un prospero aña 1999.

NI PIA NI CABEZ!!

